

Naqqiut

Saqqummiussissut 02-09-2018 ullulernerqarsimasoq taarserpaa
*(Qupperneq 2-mi immikkoortut kingulliit pingajuanni oqaaseqatigiit iluarsineqarput.
 Naqqiut taamaallaat kalaallisoortaani suliarineqarpoq)*

Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarneq pillugu inatsisip (Kinguaassiuutitigut pinerluttarnerit il.il.) allangortinneri pillugit inatsisissatut siunnersuummut missingiummut Namminersorlutik Oqartussat isumaqataanissaat pillugu Inatsisartut aalajangiiffigisassaattut siunnersuut
 (Isumaginninnermut Inatsisinillu Atuutsitsinnermut Naalakkersuisoq)

Saqqummiussissut

(Isumaginninnermut Inatsisinillu Atuutsitsinnermut Naalakkersuisoq)

Siullermeerneqarnera

Nunami maani kinguaassiuutitigut atonerluinerit ajoraluaqisumik assorujussuaq ajornartorsitigatsigit isertorneqarsinnaanngilaq. Meerartatta inuusuttortattalu amerlasuut atonerlugaasarnarat atonerluinerillu ilaannaminnguisa nalunaarutigineqartarneri pingaartumik ernumanarput.

Inatsisissatut siunnersuutip matuma pinerluttulerinermi inatsimmi kinguaassiuutitigut pinerluuteqartarnerit pillugit aalajangersakkat aamma ullutsinnut oqaatsit naleqqunnerusunngorlugit nutartissavai, taamaalilluni inatsit inuiaqatigiinnut ullumikkullu unammilligassatsinnut naleqqussarneqassalluni.

Naalakkersuisooqatigiit siulii inatsisinik atuutsitsinnermut suliassa qarfirmi periusissatut suliniutissanullu pilersaarummik suliagarput. Periusissatut suliniutissanullu pilersaarusiaq taanna inatsisinik atuutsitsinnermut suliassa qarfiup pitsaanerulersinnissaanut suliniutinik pingaarutilinnik amerlasuunik imaqartoq Naalakkersuisut isumaqarput. Naalakkersuisut pilersaarut taanna malippaat, tassanili tulleriarnerit ingerlaavartumik nutartertarniarlugit. Inatsisinik atuutsitsinnermut suliassa qarfiupput danskit inatsisinik atuutsitsinnermut suliassa qarfiannut nallersuunneqarsinnaasariaqarpoq, tamannalu suliassa qarfirmik tigusinnginnermi pisariaqarluinnarpoq.

Inatsisissatut siunnersuut danskit pillaasarnermut inatsisaannik allangortitsinernik inatsit nr. 319-imik 28. aprili 2009-mi atuutilersinneqartunik taamaattumik aallaaveqarpoq. Meeqqat kinguaassiuutitigut atonerlunneqarsinnaanerannut kannguttaatsuliorfigineqarsinnaanerannullu illersuinissaq pillugu Europarådip isumaqatigiissutaata qallunaanit atortussanngortinneqarsinnaanissaata periarfissinneqarnissaa qallunaat pillaasarnermik inatsisaata allangortinneqarnerata siunertaraa. Kalaallit Nunaata isumaqatigiissut akuerissappagu, naleqquttuussappallu, atortussanngortitseqqartoqarnissaa piumasaqaataavoq.

Taamaamat pinerluttulerinermi inatsimmi aamma eqqartuussisarnermik inatsimmi kinguaassiuutitigut pinerluuteqartarnerit pillugit aalajangersakkat allangortinneqarnissaat pillugit aalangiiffigisassat siunnersuut manna Naalackersuisut naammagisimaarinnilluarlutik saqqummiuppaat.

Innuttaasut ataasiakkaat kinguaassiuutitigut kiffaangissuseqarnerisa namminerlu aalangiisinnaatitaanerisa illersorneqarnissaat inatsisissat siunnersuummi pingaarnertut siunertaavoq. Taamaattumik innuttaasut ataasiakkaat kinguaassiuutitigut atonerlunneqarnermut kanguuttaatsuliorfigineqarnermullu illersorneqarnerisa annertusineqarnissaat aalangiiffigisassat siunnersuummi matumani siunertarineqarpoq.

Aammattaaq inatsisiliornermi oqaatsit nalunaatsuunissaat erseqqarissuunissaallu inatsisissat siunnersuutip siunertarivaa. Oqaatsitigut paasiuminartutigut aamma inatsimmi tunngaviusut erseqqissumik allaaserinerisigut, amerlanerit pisinnaatitaaffimminik ilisimasaqalernissamik periarfissinneqassapput, taamaalilluni atonerluinerit tamarmik nalunaarutigineqarsinnaalerniassammata.

Nunatsinni kinguaassiuutitigut atonerluineq qanorluunniit akuersaarneqarsinnaanngitsoq innuttaasut ataasiakkaat erseqqissumik paasisariaqarpaat, aamma eqqugaasut ilisimassavaat, inuiaqatigiit tapersersoraatik illersoraatillu.

Taamaattumik siunnersuummi kinguaassiuutitigut pinerluttarnernut suliassaqarfik allineqarmat pitsaasuvoq. Ilaatigut meeqqanik 12-it inorlugit ukiulinnik atoqateqarnerup pinngitsaaliilluni atoqateqarnermut aalajangersakkamut ilanngutitinneqarneratigut tamanna pivoq. Aamma imminnut ikiorsinnaanngitsumik imaluunniit pissutsit pissutaallutik akerliliisinnaanngitsumik atoqateqarnej, aamma katissimasut akornanni, aalajangersakkami ilaatinneqalissapput, tamanna siusinnerusumut naleqqiullugu allaaneruvoq, tassami inatsit katissimannngitsunut taamaallaat atuunnikummat.

Pinerluttulerinermi inatsimmik eqqartuussisarnermillu inatsimmik nutarterinerup matuma inuiaqatigiussutsitsinni ajornartorsiutit annerpaat ilaata akiorniarnissaanut pitsaanerusumik periarfissippaatigut. Meeqqanik inersimasunillu atonerluineq eqqugaasunut ilaqutaasunullu annertoorujussuarmik kinguneqartitsisarpoq. Ajornartorsiut annertoorujussuuvoq piaartumillu iliuuseqartoqarnissaanik piumasaqartitsilluni.

Naalackersuisut taamatut oqaaseqarlutik oqaluuserisassaq oqaluuserisassanngortippaat.